

■ OR DA LA VITA DA LUDMILLA CAHENZLI

Cedels ed il cumpost sco confiert

«Mamma! In cedel!» La vusch vegn dal corridor.

Merda! Panica! Nua pudess jau ma zuppar? Jau avr la stgaffa da rument e guard sin il cumpost. Il pli gugent ma strutzgass jau lien. Ma igl è memia tard. Il pitschen stat gia davant mai e tegna nà in cedel oransch. Igl è in oransch vaira-main aggressiv.

Jau survegn la tremblitga, na ristg betg da tutgar en il cedel e m'imaginesch tge torturas ch'il scolast ha puspè inventà per destruir mia planisaziun dal di u mia planisaziun da l'emna e per ma sfratgar psichicain.

«Metta il cedel sin maisa», di jau.

«Ti stos leger immediat, nus giain oz suentermezdi a far bogn», di el.

«Tge bun'idea», di jau tut levgiada.

«Gea. Nus giain cun velo», di el.

«Betg vair!» La panica ch'è gist tschesada, sa stortiglia puspè da mes scussal siadora. «Cun tge velo vul lura ir?», dumond jau a moda precauta.

«Cun il mieu», di el.

«Ma lez è rut», di jau.

«Jau sai», di il bolleret. «Il bab po gea svelt pinar el.»

«Lez na vegn betg a gentar oz.»

«Lura pinas halt ti el», di el e svanescha or da cuschina.

«Jau na reparesch betg velos!», clom jau suenter.

E davant mes eglis vegni verd. Betg perquai ch'jau fiss ida en svaniment. Anzi. Igl è mia matta gronda ch'è gist turnada da scola. Ella tegna in cedel clerverd davant mia fatscha. Igl è in verd propi tissentà.

«Tge è quai?», dumond jau mia feglia,

entant ch'jau guard sin la porta, davos la quala ch'il cumpost sa chatta – il cumpost, mes salvament, mes ultim confiert!

«Nus giain sin viadi da scola», di la matta.

«Bel. E cura?», dumond jau.

«Puschmaun», di ella. «Nus stuain trair en buns chalzers da muntogna, ha il scolast ditg. Betg sco tschella giada che l'entira classa aveva vaschias.»

«Cler», di jau e sugeresch: pensa positiv, Ludmilla! Ils chalzers veders van segir anc, van segir anc, van segir anc, van segir anc, van segir anc!

Suenter gentar ma rend jau giun tschaler per examinar ils velos. Tuts trais caput. Entant ch'jau emprov d'eruir tge-nin ch'jau fiss pipa da pinar, vegn la gronda: «Els fan mal.»

«Tgi fa mal?», dumond jau.

«Ils chalzers da muntogna», di la gronda.

«Nunpussavel. L'onn passà hai jau aposta cumprà els dus numers pli grond», di jau.

«Ma uss èn els tuttina memia pitschens. Jau dovr novs», di ella.

«Ti vas cun quels!»

«Na.»

«Bain», etc.

(Quai ch'jau pens en quellas minutas dals scolasts, na fiss betg hoffi da scriver si.)

La figlia lamenta uschè ditg, fin ch'jau empermet – malgrà nos contos sblundregiads – dad ir cun ella a comprar chalzers novs.

Ina mes'ura pli tard èsi ruassaivel en chasa. Ils uffants èn puspè a scola u ids a far bogn. Speranza tegna il velo! Igl è il

sulet suentermezdi che tuts han scola. Tge bellezza! Tge libertad infinita! Fin las 15.30.

Jau fatsch in café, ses giu en davos maisa ed ignoresch il cedel verd cun la lunghezza glista da chaussas che la gronda ha da prender cun sai sin il viadi da scola. «Tai na legel jau uss betg», di jau a la glista e guard demonstrativamain en in'otra direcziun.

Mia eglia da croda sin la paraid da pin. Là penda in cedel mellen. Quest cedel ma para insaco enconuscent. Cler, quai è il cedel pervi dal policist che visita la classa da mia matta pitschna. Cura è quai atgnamain? Jau prend il cedel giu da la paraid. Quai è gea oz. Oz suentermezdi. Il policist mussa als uffants co ch'ins va sur via vi. Mia eglia da croda sin l'ultima construcziun. «I vegn giavischà che la mamma u il bab assista a la scolaziun da traffic.» Jau avr la porta da rument, guard en il cumpost e vi siglir viaden. Ma lura cumpara il maletg da mia pitschna matta davant mes eglis. Ella ha instrucziun da traffic. Il policist è là. Tut las mammas èn là. Danor la mamma da mia pitschna.

Jau ser immediat la porta, lasch esser mes café café, lasch esser naira mia detta da pinar velos e festin da vegnir ad uras a l'estrucziun da traffic.

PS: Per cas ch'jau avess in di dad esser svanida, guardai simplamain en il cumpost!

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria

